

Ibintu 7 ukwiye kumenya ku rukingo rwa COVID-19



Icya #1 Inkingo za COVID-19 ntizigutera COVID-19.

Inkingo za COVID-19 ntizirimo igice cya virusi, bityo rero ntizagutera COVID-19. Inkingo za COVID-19 zikurinda virusi. Ushobora kugerwaho n'ingaruka nyuma yo gukingirwa, nko kubabara akaboko cyangwa guhinda umuriro. Ibi ni ibintu bisanzwe kandi rusange.



Icya #2 Inkingo za COVID-19 zirizewe, nubwo bazikoze ku buryo bwihuse.

Nta ntambwe yasimbutswe mu gukora inkingo za COVID-19. Abahanga mu bya siyansi ku isi bamaze igihe kirenga imyaka icumi bakora kuri iri koranabuhanga. Niyo mpamvu byashobotse gukora urukingo rwizewe kandi rukora neza ruboneka byihuse.



Icya #3 Inkingo za COVID-19 zishobora kukurinda virusi irenze imwe.

Virusi zirahinduka, cyangwa zigatera ihinduka rito uko igihe kigenda gishira. Amakuru agaragaza ko inkingo za COVID-19 zikora neza mu kurwanya ubwoko bwa virusi butera COVID-19 twabonye kugeza ubu.



Icya #4 Inkingo za COVID-19 ntizihindura aside iba mu ngirabuzima fatizo (DNA) zawe.

Inkingo za COVID-19 ni inkingo za mRNA kandi nta hantu na hamwe zihurira na DNA yawe. Zituma habaho imyitwarire y'ubudahangarwa irema abasirikare b'umubiri bakurinda kwandura COVID-19.



Icya #5 Inkingo za COVID-19 ntaho zigeze zihurira n'ubugumba cyangwa gukuramo inda.

Inkingo za COVID-19 ntizigeze zitera ubugumba abagore barwaye iyi virusi, nta mpamvu rero yo gutekereza ko urukingo rubuteza. Hari amakuru amwe yagiye akwirakwira kuri interineti **atari ukuri**; avuga ko poroteyine iri mu rukingo yibasira poroteyine yo muri nyababyeyi. **Ibi ntabwo ari ukuri**. Umubare muto wa aside amino uri muri izi poroteyine ebyiri ntiwatera icyo kibazo. Inkingo za COVID-19 ntizari zageragezwa ku bagore batwite, ariko abagore batwite bajya bahabwa inkingo z'ubundi burwayi mu gihe batwite. Abagore batwite bafite ibyago byinshi byo kurwara indwara zikomeye ziturutse kuri COVID-19 kandi hari ibyago ko wakwanduza COVID-19 umwana wawe nyuma yo kuvuka. Vugana na muganga wawe urebe niba wakingirwa.



Icya #6 Inkingo za COVID-19 ntizirimo microchip (soma mikorocipu) cyangwa ibikoresho bigaragaza aho abantu baherereye.

Ibinyoma bivuga ko inkingo za COVID-19 zirimo microchip cyangwa ibikoresho bigaragaza aho abantu baherereye **byagaragaye ko atari ukuri**. Tuzi neza ibiri muri buri rukingo. Urutonde rw'ibigize buri rukingo warusanga kuri [interineti](https://www.interineti).



Icya #7 Abantu barwara indwara zidakira bagomba guterwa urukingo igihe cyabo cyo gukingirwa nikigera.

Niba ufite uburwayi budakira, nka diyabete, ufite ibyago byinshi by'uburwayi bukomeye buturutse kuri COVID-19. Inkingo za COVID-19 zirizewe kandi zikora neza ku bantu bafite uburwayi budakira.